

1400. Clemens qui et Rupertus, Palatinus Reni, dux Bavarie, eligitur reprobato Wentzlao ac deposito confusibiliter. Hic Clemens instituit studium universale in Heydelbergk. Hic procuravit fieri doctorem Matheum de Cracovia episcopum Wormacie. Hujus tempore dux Brunswigk occiditur, qui bellum obtinuit prius circa Wysen contra Hildensemensem et nobiles ejus terre.

1410. Sigismundus eligitur, filius Karoli quinti (sic), et bellum perdidit cum Turcis. Gloriose egit in concilio Constantiensi, quia pacem ecclesie procuravit tribus Romanis pontificibus depositis, et in concilio Basiliensi fuit, pacem ecclesie servavit interim quod vixit. Anno 1437 mortuus est.

Anno 1411 rex Polonie cum vicesies centum milibus vicit dominos Prutenos, et ceciderunt 40 milia Prutenorum et 60 milia de exercitu regis Polonie, tamen obtinuit victoriam.

1438. Albertus dux Austrie¹⁾ electus est, qui et habuit filiam Sigismundi. Duobus quasi annis vixit et bonus fuit.

1440. Fredericus dux Austrie eligitur, qui hodie imperium tenet, scilicet anno 1456. Hic coronatur a Nicolao quinto post jubileum annum. Hic concilia multa congregavit cum electoribus imperii tempore scismatis, in quibus tamen nichil diffinitum fuit. Ipse tamen plus ad Eugenium declinavit, cui tandem obedientiam cum aliis prestitit.

1444. Temporibus hujus Wilhelmus, dux Saxonie et lantgravius Thuringie, duxit uxorem filiam Alberti regis Romanorum Bohemie Ungarie, Annam nomine. Hic a. D. 1450 bellum grave habuit cum fratre suo Frederico, terram ejus vastavit et victoriam obtinuit; pacem fecerunt et illos qui causa discordie fuerunt, de terra compulerunt etc.

Anno Domini 1444 reges (l. rex) Polonie occupavit regnum Ungarie et processit cum Polonis et Ungaris contra Turcos. Cardinalis Julianus, quondam legatus pape pro concilio Basiliensi celebrando, in exercitu fuit ex mandato pape. Et in vigilia sancti Martini venerunt super eos Turci et occiderunt inprovisos circa triginta milia. Et Julianus cardinalis, vir sobrius et prudens, cum equo fugit, et tertia die repertus ab Ungaris dure reprehensus et (l. eo) quod auctor malorum et mortis causa omnium suo concilio (l. consilio) fuerit, occisus est et in frusta ab eis divisus.

Anno Domini 1459 facta est concordia inter regem Bohemie et lautgravios Thuringie et Missn. et filius regis filiam domini Wilhelmi duxit in uxorem, et filius domini Friderici duxit filiam regis in uxorem. Hec acta sunt in Egra.

1) Hier ändert sich die Hand etwas, doch ist das Folgende bis zum letzten Satz excl. rubriciert. Bei 1459 aber, und wieder bei 1460, ist eine Aenderung der Hand wahrzunehmen.